

LIGÁRADAN SANTIÁGO

Labúrñan Santiágo joun tílana ligílisi buri ja chagágubaña

1 ¹Áu Santiágo, esériwiduti lun Búngiu lúma lun Wabúreme Jesucristu áu, mábuga níña joun ja jadúgawagubaña dúusu lirájüñü Israël ja chagágubaña lídan sun ubouú.

Subúdi le ñúbinbei lúmagiñe Búngiu

²Nidújeñu, lúnti gúndan jumá dan le jasúfurirun furúmieguarügü oúchawagúni. ³Subúdi jumáli luágu dan lan le louchawagún jafñen, furéndeitimaatün gagúraasuni. ⁴Ítara líña lubeíti, maríbadalá jarítagnun lueígiñe jóuchawagún, lubáragiñe líra, ígira jumeí oúchawagúni ligía lun líchugun lánwoun jugúraasun, lun loustarun lubuídun jigáburi, úouga mégeiti luágu.

⁵Dan le ibídiñe lan jun cába lan jadúga lídan ában lénreengunga, amúriaja jumá lúma Búngiu, ábame lasúbudiragüdüni jun cába lan jadúga. Rulumuti Búngiu subúdi le jamúriajan lánigu lúma joun, quei jamúriajani, maríñagunga ni cáta joun luágu. ⁶Lúnti jamúriajan láu affñeni luágu líchugubei lan Búngiu le jemégeirubei jun, máma láu liloúguan affñeni, le lougua tafñen, ítara líña quei ában lugúdi barána le lanúgübei garábali lueígiñe ában oúbaü lun luágun ámu. ⁷Gürígia le medéraaguagüdünti laffñen, marítagonalá luágu libjuba lan ni cáta lúmagiñe Wabúreme. ⁸Lugúndun gürígia le affñe líñabei, maffñen, siñáti lasígirun ában igáburi le derégüdagwati luágu ni cáta.

⁹Idújei le gudémebei, majírudalá luágu, gúndaalá luágu irisini le siélubei lubá. ¹⁰Léti idújei le rísibei, manáangualá lúngua luágu, gúndaalá luágu larúfuduni Búngiu lun luágu mebégi lan lirísín lun ni cáta lídan cátei le lánina siélu. Lugúndun ítara líña rísiti quei lufúlurin jíduru, le siñábei ladúrarun.

¹¹Dan le láfuridun wéyu, ába lásüdüñ sarágu, ába lásäürün jíduru, ába leíguadun lufúlurin, ába lagúmuchun lubuídunmeraü. Ítara lúba gíñe rísiti. lachúlürüba wéyu lun louñwen, ábame lígiruni sun láfaagun luágu seínsu.

Oúchawagúni lúma adúndeijoúni lun wuríbani

¹²Gúndaati gürígia le awándubalin oúchawagúni láu gurásu, lugúndun dánme le láfuridun láu buídu, libjubei ibágari magúmuchaditi le uágubei

laríñaga Búngiu luágu líchugubei lan joun ja jínsiñejabúbaña lun, queísi ában afáyeiruaiaü, queísi ában rídi. ¹³Dan le lebélurun lun ában güri-gia lun ladúgün cátei wuríbati, marítagonalá luágu Búngiu lan ádarubalin cátei ligía lídoun, lugúndun mebéluti lídoun Búngiu lun ladúgün wuríbani, máda lumúti gíñe jádoun güri-gia lun jadúgüni. ¹⁴Lubáragiñe líra, dan le lacháwajani luríban layúmajan mútu, ligía láburujan lídoun ladúgün le wuríbabei. ¹⁵Lídaangiñe buri luríban ayúmajani le, liábin figoú, ában ibágari lánina figoú barúti oúweni.

¹⁶Nidújeñu jínsiñetiña nun, mayéedagua jumá júngua arítagua luágu lúmagiñe lan Búngiu liábin wuríbani. ¹⁷Lubáragiñe líra, sun buíti le íchugúbei woun, le úabei mégeiti luágu, lúmagiñe Búngiu le adúgübalin lilámpuna siélu liábin. Búngiu súnwandan ligía méme lan, úati sáansiguaü lídan quei lilámpuna siélu le gabúlubudadíbei. ¹⁸Ligía lugúndaabei lun ladúgüniwa lirájüñume láu wafíñerun luágu lerérun le inárünibei, lun ítara wamá quei furúmiñeti alúbajani le íchugúti lun Búngiu lídaangiñe buri cátei le ladúgübei.

Ligáburi agúnfuliruni lúma Búngiu le áubei lagúndaara

¹⁹Ligía lubeíti, nidújeñu jínsiñetiña nun, cáda ában jídaangiñe lúnti aráanseñu lan lun lagáambun, áni lúnti jámaru lan lun ladímurejan lúma lun lagáñidun, ²⁰lugúndun güri-gia le gáñibei, madúgün lumúti le áubei lagúndaara Búngiu. ²¹Ígira jumeí lubeíti sun iwíyeni lúma luríban igáburi le jídaangilibei, resíbi jumeí ugánu le bunáwaalibei tídan janígi láu únabuni, lugúndun gabáfuti ugánu ligía lun lasálbarunun juwáni.

²²Adúga jumeí le taríñagubei Lerérun Búngiu, máma lun agáambarügü jumáni. Anjein jarítagua jubeí luágu buídurügü lan lúnrügü jagáambuni Lerérun Búngiu, jeyéedaguña júngua. ²³Le agáambarügübalin, madúgün lumúti le lubeíbei, ítara líña quei ában güri-gia le aríagubei lúngua tídan ában isúbusein. ²⁴Aríja lumúti ída líña lan, áni quei lídin, ítara labúlieiduni ída líña lán buga. ²⁵Anjeinti güri-gia le jéhubei atúriajei Lerérun Búngiu le úabei mégeiti lídan, áni furáangugüda láwa lueígiñe figoú, mabúlieidun lubeí le lubeíbei, adúga lumúti le laríñagubei Lerérun Búngiu áni gúndaati le tímatimaati.

²⁶Güri-gia le jarítagubei luágu gúnfuli lan lúma Búngiu áni siñá lumutu liñéne erédera, leyéedaguña lúngua áni úati ju lan ligáburi lagúnfulirun lun ni cáta. ²⁷Niján agúnfuliruni le jarúmabei, le áubei lagúndaara Wáguchi Búngiu. lun wíderaguniña magúbüri-gujaaña jáma würiña ja jiláaña úmari lídan jadíjeri, lúma lun madáseirun wamá láu buri cátei wuríbati le lání uboú le.

Lúnti ában lan láu janügün sun güri-gia

2 ¹Nidújeñu, queísi jugúya lan güri-gia ja afíñebaña luágu Wabúreme Jesucrístu le weírigubei, moún lumuti ámu lan janügün ában güri-gia jaweí jíbiri. ²Queí buri jamúga, lun jamúga lebélurun ában wügüri lídoun

jadámurin láu bágü gólu túma anáanguni fínutu, belú ligía gíñe ában gudémeti táu anáanguni juchécheeru, ³ánjaün eténira lun le fínubei anáangun buídu, lun jaríñagun lun. “Ñurúba ya lídan ubáraü buíti”, jaríñaga lun le gudémebei. “Amúrü, reídeibá rára, o ñurúba ya múarugu”, ⁴janúgüña ában güirigia ámu lueí le ában, áni jagúseragüdüña láu luríban arítaguni.

⁵Nidújeñu jínsiñetiña nun, agáamba jumeí cátei le. anúadaja láaña Búngiu ja gudémebaña lídan ubou le lun rísi jamá lídan jaffíñen, lun gíñe jerésibiruni arúejani le uágubei laríñaga Búngiu joun ja jínsiñejabúbaña lun luágu líchugubei lan joun queísi jalágaante. ⁶Ánjeinti jugúya, rújumutiña gudémetiña lídoun busíganu. ¿Máma funági rísitiña ja wuríbabei jóuserunün, áni barújamaün adúruujeina ligíbugiñoun lúrudu? ⁷¿Máma jagía adímurejabaña wuríba luágu líri Cristu, le inébebei jun, le únbei jedéregeragua júngua?

⁸Ánjin inárüni lubeí luágu gúnfuli jumáni líñun-ágei lúrudu queísi taríñaguni Lerérün Búngiu. “Jínsiñelá güirigia bíledi bun quei bñsiñegua búngua”, buíti jadúga. ⁹Ánjin máma lubeí ában láu janúgüñiña sun güirigia, jadúgüña figou, dürrúga jumúti lílúrudun Búngiu. ¹⁰Lugúndun ánjin agúnfulira ában güirigia láu sun lúrudu, ígira lagúnfulirun ában lídaangiñe, gadúnrunti luágu ladúraaguni sun lugúmadin lúrudu. ¹¹Lugúndun Búngiu méme le aríñagubei. “Madúgabá salúfuri”, aríñagati gíñe. “Máfarajabá.” Ánjin lubeíti madúgün güirigia salúfuri, áni áfarajati, mídinti láu le lubeíbei lúrudu. ¹²Jugúya, lúnti jadímurejan, agáburida jugúyame queísi lúntiña jagúserawagüdüñ láu lúrudu le furáangugüdbaliwa lueí lubáfu figou. ¹³Ja magúdemejabubaña joun ámu, magúdemejabubei gíñe Búngiu joun lídaanme wéyu lánina agúseruni. Ánjaña ja gudémejabubaña, buídubei jáfuridun lídaanme lidáani agúseruni.

Afíñeni lúma wadágimanu

¹⁴Nidújeñu, ¿cásan ju lan laríñagun güirigia luágu afíñe lan luágu Cristu ánjin madúgün ni cáta lun larúfuduni? ¿Gayáraati funági lasálbaruni afíñeni ligía? ¹⁵Quei jamúga guetó, níjein ában idújei wügüri o würi emégeiruti anáanguni lúma eíginí, ¹⁶laríñaga ában jídaangiñe lun. “Buídulá lídin bun, darúguabá bougua, jou amúrume,” áni míchu lumúti le lemégeirubei lun, ¿cági ju lan líra? ¹⁷Ítara líña lasúseredun lúma afíñeni. ánjin marúfudun jamá güirigia láu cátei le jadúgübei, afíñeni lábuguariügü, ítara líña quei ában cátei jiláali.

¹⁸Fágua níjeinbei aríñaguti. “Amúrü afíñetibu, áu adúga numúti le buídubei.” Áu Santiágo aríñagatina lun idújei ligía. “Arúfudabeíti baffíñen nun bougudin lueí buíti le badúgübei, narúfudeime naffíñen bun láu buíti le nadúgübei.” ¹⁹Afíñetibu luágu ában rügüñein lan Búngiu, buíti badúga, afíñetiña gíñe máfianu luágu líra, adádagara jagía láu anúfudei lueí. ²⁰¿Májatibu baffíñerun, ibídiougua táu amúrü le, luágu jiláñu líña lan laffíñen güirigia ánjin marúfudun lan láu le ladúgübei? ²¹Resíbi lumúti Búngiu Abrahám, le binádu wáguchi, queísi richáguati ligíbugiñe

luágu le ladúgübei dan le lánjarun lún yebe láfaruni Isáac le liraú jilágubei queísi adágaragüdüni lun Búngiu. ²²Aríja báali luágu arúfuda láni Abrahám laffínen láu cátei le ladúgübei, áni núbinti laffínen lun dayáruhei lan láu cátei le ladúgübei. ²³Ítara líña lagúnfulirun le bürüwañubei tídan Lerérun Búngiu. “Affíneti Abrahám luágu Búngiu, áni luágu laffínen, ába lerésibiruni Búngiu queísi wügüri richáguati ligíbugiñe.” Áni aríñawagüati luágu Abrahám, “lumáda Búngiu.”

²⁴Aríja jumáli lubeíti, luágu resíbi láni gíñe Búngiu wügüri luágu buíti le ladúgübei, úara lúma laffínen, áni mámarügü luágu laffínen. ²⁵Ligía méme meja asúseredubei tun Raháb, to jóru lídan dan le sügüjalibi. resíbi lumútu Búngiu queísi richáguatu ligíbugiñe dán meja le tarúfuduni taffínen luágu láu cátei le tadúgübei—safá tumútiña loúnagülegu Josué, ába tíderaguniña lun jagíribudun lídaangiñe ámu úma. ²⁶Ítara quei jiláñu líña lan úgubu ánjein úa tubeí uwáni lídan, jiláñu líña gíñe jaffínen ánjein marúfudun jumá láu cátei buíti le jadúgübei.

Lúnti wabúgurunun wañéñe wayúmulugu

3 ¹Nidújeñu, moún lumuti añájein lan sarágu jídan ja adáagutiña jóungua arúfudajatiñame lánina Lerérun Búngiu lugúndun subúdi jumáli luágu wagía lan le arúfudajabei, derégüdatimaabei lan wagúserawagüdüñ. ²Sun wagía adúgatiwa cátei charáti, ánjein njein lubeí ában güirigia madúgünti ni murúsun charáti lídan le laríñagubei, ában wügüri buíti le gumúti ligía, le gíñe gayáraabei labúguruni sun lúgubu. ³Dan le wagúrrüni jayúma anímaalugu lun jagáambuníwa, gayáraati wabúguruni sun jágubu. ⁴Aríja jumoún buri gíñe ugúnein, láu sún buri weínamu tan áni jéreburi garábali le ádajabarun, abúgura lumútu abúguruti láu ában liraúraü simúnu le nínjin lumúti labúseera. ⁵Ítara líña gíñe lasúseredun lúma wayúma, ában cátei núraúraüti, áni gayáraati ladúgün sarágu buri cátei weínamuti. ¡Láu murúsun wátu geméti, gayáraati lágudún ában oúnwenbun áraabu! ⁶Ítara líña wayúma quei ában wátu geméti. Gayáraati wadúgün sarágu wuríbani láu, gayáraati lagádeiruni sun le wagíabei. Gayáraati líchuguníwa lídoun wuríbani lídan sun wabágari, Máfia guánarü lébunabei sun le. ⁷Gayáraati lagídaruni wügüri jagáñi sun jawúyeri anímaalugu gáñitiña—dunúru, jéwe, jáma anímaalugu baránajana—áni adúga láali. ⁸Úati ni ában lun gayára lan lagídaruni ligáñi wayúma. Ában wuríbati ligía le mígiraguagüdüñbei lúngua, áni buin líña láu peísini le gáfarajati. ⁹Láu méme wayúma wadímureja buíti luágu Wáguchi Búngiu, láu gíñe wíñaraguaña güirigia ja ladúga Búngiu lenége. ¹⁰Lídaangiñe méme ában iyúmaü láfurida dimúrei buíti lúma íñaraguni. Nidújeñu, moún lumuti ítara lan cátei le. ¹¹¿Gayáraati funági láfuridun dúna bímeti lúma dúna básuati lídaangiñe méme ában? Siñáti. ¹²¿Gayáraatisan tagíindun ában tídibu figi fáluma, ódi gayáraati tagíindun tídibu beíbei figi? Siñáti giñéti láfuridun dúna bímeti lúma dúna básuati lídaangiñe méme ában.

Subúdi le inárünibei

¹³Ánjein níjein lubeí ában chu táu jídan, gunfaráanda ligía, arúfudaleí láu lubúidun louuserun, láu únabugubuni le líchugubei lisúbudin lun. ¹⁴Ánjein níjein lubeí gimúgaü tídan janígi, áni jadúgüni cátei láu jarítangun juágun guánarügü, moún lumútiti janáangun júngua luágu jisúbudin, lugúndun iyéeni líra. ¹⁵Máma niján luwúyeri subúdi le núbinbei lúmagiñe Búngiu, ában subúdi le lánina uboú líra, le lánina jasáminan gürígia, le lání méme Máfia. ¹⁶Lugúndun le ní lumuti gimúgaü luma marítawaguni jawágun ámu, níjein chagáguäü ní luma sun luwúyeri wuríbani. ¹⁷Ánjaña ja gámabalin subúdi le lúmagiñebeí Búngiu, furúmiñe níjein ában ibágari jarúmati jawágu, gálumatiña, areídatiña, gagáambaditiña, gudémejabutiña, adúga jamúti le buídubei, ában lábu janügüniña sun gürígia, furáangutiña. ¹⁸Ja áluajabalin darángilaü, bunáguatiña ílaü lun lalúbajoúniwa ában ibágari le richáguati jádan, luma jádan ámu.

Gamádaguaü luma uboú

4 ¹¿Cá buri ueígiñe jabúseera jawúribujan, luma jageíndagun? Ladúga buri lagúbüri ayúmajani le jídaanbei súnwandan. ²Buséntün som cátei, quefti siñá jumani ibíja, ába jáfarajan. Gimúgatün luágu som cátei, quefti siñá jumani ibíja, ába jageíndagun. Mibíjin jumúti le jabúseerúbei lugúndun mamúriajan jumáni luma Búngiu. ³Ánjein jamúriaja, mibíjin jumúti lugúndun luríban jamúriajani, jabúseeruni lun jagástaruni luágu lagúbüri jugúndan. ⁴¿Gürígia múaraantiña! ¿Íbídíñetísan jun luágu ánjein lan gamádagua jubeí luma uboú, jáganiñein lan Búngiu? ⁵¿Jarítaguatúnsan luágu mála lan le taríñagubei Lerérün Búngiu luágu buri cátei le? ¿Jarítaguatün funági luágu Espíritu lan le lagánawagüdübei Búngiu wádan ában lan espíritu le lánina gimúgaü? Uá. ⁶Íderagua lumútiwa Búngiu láu lareíni, láu líchuguni ubáfu woun lun wáfaruni gimúgaü le wádaanbei jilágubei. Taríñajare Lerérün Búngiu. “Rúlumuti Búngiu lanágan jawágun ja baríguabaña jóungua, áni íderagua lumútiña ja únabugubaña, láu lareíni.” ⁷Rúgua jumá júngua lábugiñoun leréeejan Búngiu, rára jumá derégüdagü láu lubáfu Búngiu, mabáfu lámuga Máfia juágu, ábame lanúrajan jueí. ⁸Yaráfa jumá lun Búngiu, ábame gíñe layárafadun jun. Jugúya le busénbei jesériwidun lun Búngiu luma lun uboú, gaffgounjadün, ítara líña lubeíti, jarúmagüda jumeí jigáburi túma gíñe janígi. ⁹Lídan le jayárafadun lun Búngiu, aságürija jumá luágu jiffgoun láu águiraü. Gáritá janígi luágu luríban jigáburi luma Búngiu, sáansigualá jugúndan lun írui luágu jiffgoun. ¹⁰Únabuguagüda jumá júngua ligíbugiñe Búngiu, ábame líchugunün íñugu.

Adímurejani luágu idújei

¹¹Nidújeñu, madímureja jumá wuríba jawágu jíbirigu. Le adímurejati wuríba luágu lidúje, o ladárirun lan lidúnrun, ladímurejaña wuríba

luágu lilúrudun Crístu le aríñagubei luágu moun láni ladügúniwa, áni ladáriuña mégeiti luágu. Ánjein jadúga líra lubáragiñe jadügúni le lubeíbei lúrudu, jíchaaguña júngua queísi agúseragüdüti. ¹²Ában rügúñein agúseragüdüti, le íchugubalin lúrudu ligía, le Crístubei méme, lérügü gabáfubei lun lasálbajan o lun lagúnrinchagun. Ánjein bugúya, ¿cátabuñadíbugi lun badárirun lidúnrun ámu?

Machoururunwalá luágu jarúga

¹³Guetó, agáamba jumeí catei le, jugúya le aríñagubei. “Ugúñe o jarúga wóúdiba lídan ítaga fulásu, ábame webélujan ñi ában írúmu, wawádigimaribei waseínsun lun wabíjin lánwoun.” ¹⁴¿Ída liñásan jasúbusiruni cába lan asúsereda jarúga? ¿Cáteiñeigi jibágari? Ítara líña quei jeméreedu le asálrágubei luágu murúsun dan, lárigiñe ába lagúmuhagun. ¹⁵Aríñagarügütün jamúga. “Ánjein busén Búngiu, wabágariduba, ábame wadügúni le o líra.” ¹⁶Ánjeinti jugúya, jadímurejan láu pántaü luágu catei le jarítágubei lun jadügúni, áni sun pántaü le, mabuíduñti. ¹⁷Affñetina luágu ánja jumá lun sun le, wel, le subúdiabubei lun ladügün buíti áni madügün lumúti, ladügúña figoú.

Ewéridijani joun rísitiña

5 ¹Agáamba jumeí catei le, jugúya rísitiña le wuríbbabei igáburi! Chülújali óra lun jayájuajan, wágu jugúyame luágu buri lamíselu le lúnbei jasúfuriruni. ²Ñaláali buri jirísín, jou jamáaru jamútiri janáangun to fñuboun. ³Gájüjali jigólun lúma jáni pláta, áni láu catei méme le, arijúati jarügüen, ábame jagúnrinchawagún lueígiñe camá jamuga láu wátu geméti. Oúndaraguaadün sarágu írísini lídoun buri lagúmujoún dan le. ⁴¿Ánti fáyeiti le míchu jubeí joun ja ñadágimeinbalin jichári? Ánjein jamúga gayáraati, lagúajaña jamúga fáyeiti ligía luágu jidúnrun, agáamba láali Búngiu jamúriañan ñadágimeintiña jagía juágu. ⁵Rúguaadün júngua lun ában ibágari lánina wéndeí lúma ugúndani ya uboúagu, ibíja jumáali sun le jabúseerúbei quei jadíbunedagüdúniwa anímaalu lubá jáfarun, yaráfaali gíñe jagúnrinchawagún sun jugúya. ⁶Rújadün jadúnrun ja madúnrunbaña, áfaragua jumáña jilágubei, madügünga jagía ni cáta le lébuna jáfaraguniña.

Gurásu lúma ayúmuraguni lun Búngiu

⁷Ligía lubeíti, nidújeñu, gagúraasun jumá daríme liábin Wabúreme Jesús. Ábunaguti le agúrabubei ladügün alúbajani buíti, lúnti lagúrabajani furúmiñeti júya luágun líla linádirigu lúma lagúmujoún júya luágun lun láfunadun. ⁸Gagúraasun jumá gíñe, máburujan ligíame jarúna, lugúndun madíseeli liábin Wabúreme. ⁹Nidújeñu, mequéjera jumá jawágu jidújeñu lueígiñe Jesucrístu, magúserawagüdün jumámuga, yaráfaali lidáani Búngiu lun lagúseragüdün. ¹⁰Nidújeñu, barú jumaña profétagu já meja adímurejabaña lídan líri

Wabúreme queísi ában jémpulu lánina gurásu luágu asúfuriruni. ¹¹Wagía, barú wamutiña ja awándubalin asúfuriruni queísi gürígia gúndaatiña. Agáambaadün luágu lugúraasun Job, áni subúdi jumáali gíñe ída líña lan fuleísei láni Búngiu lagúmujoún óra, lugúndun areídati Búngiu, gudémejabu.

¹²Louígiñe sun cátei, nidújeñu, máfiñura jumá ni luágu líri siélu, ni luágu líri múa, ni láu ámu luwúyeri áfiñuruni lun jachoúruruni jerérun. Dánme le jaríñagun “ánja”, lun ánja lan, dánme gíñe le jaríñagun “uá”, lun gíñe uá lan, míchugun lámuga Búngiu jidúnrun.

¹³Ánjin lasúfuriruña lubeí ában jídaangiñe, lúnti layúmuragun lun Búngiu. ¹⁴Ánjin sándiñein lubeí, lúnti lagúarun joun tábutigu liglisi lun jayúmuragun lun Búngiu luágu, lúma lun jájurudaguni láu áili lídan líri Wabúreme. ¹⁵Dánmeti le jayúmuragun láu afíñeni, ábame lareídagun sánditi, áni ánjin gíñe afígounjaali lubeí, ferúdunawabei lifígoun. ¹⁶Ligía, gúfese jumeí lubeí jifígoun joun jidújeñu lueígiñe Jesucristu, áni ayúmuragua jugúyame jawágu lun jareídagun. Weíriti lubáfu ayúmuraguni lun Búngiu le ladúgübei gürígia le buíti táu sun lanígi. ¹⁷Proféta Elías ában meja wügúri quei wagía, dan le lamúriajanbei lídan layúmuragun lun Búngiu lun májuyun lan júya, reídeiti júya májuyunga úruwa-irúmu-dimí. ¹⁸Lárigiñe, dánya le layúmuragun, ábaya lájuyun júya, ábaya tájüchün sun inádirigu uboúagu.

¹⁹Nidújeñu, ánjin egéyeda ában jídaangiñe lueí úma le richábei, liábin ámu lun lagríbudagüdüni, ²⁰subúdi jumeí luágu furúmieguarügü lan agríbudagüdüti le afígounjabei lídaangiñe luríban lémeri, lasálbaruboun lan luwáni afígounjati ligía lueí tídin máfiougati, áni ferúdunagüdaleíme sarágu lifígoun gürígia lé yebe acháragadubei.